

四庫全書

集部

欽定四庫全書

大全集卷七

明 高啟 撰

五言古詩

曉卧丁校書西軒

窻月淡欲失矐矐逼初曙屋外鳥聲多應知有嘉樹殘
香掩幽寢末事澄紛慮頗似宿東巖僧齋竹深處

水上盥手

盥手愛春水水香手應綠
泫泫細浪起杳杳驚魚伏
惘悵坐沙邊流花去難掬

贈漫客

畸人誠達生聱叟亦曠士
漫客乃其徒放意在雲水
有山即漫游有竹仍漫止
漫吟不求工漫飲不須美
與物無留情所適皆漫爾
人生本漫寄何事紛戚喜
與子作漫文逍遙論茲理

晝睡甚適覺而有作

閒居况懶拙盡日無營爲掩室聊自眠一榻委四肢向
暄思益昏南窻滿晴曦吾神誰能繫八表從所之殷憂
常苦縈茲焉忽如遺有身不自省此外安得知覺來鄰
雞鳴已過亭午時如遊鈞天還至樂不可追我意在有
適寧顧朽木嗟猶勝夸毗子塵中爭走馳

秋日端居

秋意日蕭索郊園霜露餘出遊無山水聊復守吾廬巷
轍久已斷山瓢仍屢虛非甘寂寞者誰樂此閒居

夢鍾離兩兄

淮水去不極，淮山與偕馳。鍾離兩遷客，路遠歸何期。孰云歸無期，此夕乃見之。握手說辛苦，杯觴復同持。須臾忽驚別，我夢方自知。雖夢亦足喜，况乃歸來時。

雨中留徐七賁

江寒宿雨在，落葉滿村溼。留君繫君艇，莫犯風潮急。試問欲歸城，誰家借蓑笠。

看刈禾

農工亦云勞此日始告成往獲安可後相催及秋晴父
子俱在田札札鑷有聲黃雲漸收盡曠望空郊平日入
負擔歸謳歌道中行鳥雀亦羣喜下啄飛且鳴今年幸
稍豐私廩各已盈如何有貧婦拾穗猶慙慙

晚步遊褚家竹潭

落日猶半野閒來潭上遊非因戀幽賞聊欲散煩憂澄
波魚噉夕荒竹鳥吟秋不是愚溪上胡為吾久留

召修元史將赴京師別內

承詔趣嚴駕晨當赴京師佳徵豈不榮獨念與子辭子
自歸我家貧賤久共之閨門藹情懽寵德不以姿天寒
室仍罄何忍遠去茲王明待紬文不暇顧我私息息愧
子勤為我烹伏雌攜幼送我泣問我旋軫時行路亦已
遙浮雲蔽川坻宴安聖所戒胡為守蓬茨我志願裨國
有遂幸在斯加餐待後晤勿作悄悄思

早發土橋

空山遠無驛逆旅聊可宿懷征候鳴雞燃帶續我燭僕

夫昨行苦爛漫睡正熟呼之愧怱怱推車出茅屋高巖
尚懸斗深谷未升旭欲亟去反遲怪石暗屢觸思當在
家樂日晏始舒足胡為此行邁霜露勞局促王事靡敢
辭非闕徇微祿

車過八岡

上岡如登天下岡如決川勞哉挽車夫呀喘當我前兩
轅鬪欲摧土石厲且堅我行憫其憊時下息彼肩雖非
古羊腸實懼覆與顛如何道路子車來競連連白日已

傾仄我行尚迴遑安得駕逸足平野超飛煙

寓天界寺雨中登西閣

片雲出鍾山陰滿江東曉幽人閣上寒風雨啼鴛少紅
塵禁陌淨綠樹層城繞不為怨春徂離懷自憂悄

送陳四秀才還吳

君是故鄉人同作他鄉住同來不同返惆悵臨分處手
把長干花回望長洲樹恐起憶家心愁題送君句

送聯書記東歸

旅寓古寺間得與名僧居時因簡牘暇共諦楞伽書倚
閣山暝後步廊月生初屢聞真詮妙一使羈縻舒茲晨
別同袍言旋舊精廬飛雲自無滯愧我焉能如東浦秋
正遙西齋夜應虛傷離固知妄相送聊踟躕

送禮部傅侍郎赴浙西按察

聖主想賢哲夫君歛來東姓名簡睿聽召對明廷中彷彿
似其先夢寐相感通秉綸坐西掖曳履遊南宮復輟
要近居住試澄清功糾郡握使節炎天凜霜風顧余謬

珥筆言笑獲屢同無端此分袂離抱何忡忡

對園柳

依依客園柳來時未堪折今看夏條長上有新蟬咽芳
序惜推遷佳人念離別秋風莫遽起旅思方騷屑

僕至得二女消息

我僕持尺書來自我故鄉讀書意未了呼僕問彼詳云
我兩小女別來稍已長大女手摻摻窗前學縫裳小女
啼啞啞走索瓜果嘗喜爺有使歸迎門各踉蹌我坐聽

此言欲慰意反傷稍近尚爾思更遠何能忘

菊鄰

菊本君子花幽姿可相親
清秋發孤艷似避東風塵
采霜露餘繁英正鮮
新車馬不過賞相看但幽人
幽人苦愛菊自是柴桑倫
閒園誰與語叢栽四為鄰
入徑朝摘遠循籬暮觀頻
一壺每對酌折花挿盈巾
殊勝處俗里歌呼醉遭嗔

出城東見古松流水坐憩久之

空潭寒無藻瑩淨涵青天長松百餘株扶疎繞潭邊我
行值幽境坐賞忘歸旋清風似相娛西來忽渺然水動
松亦鳴紛披復淪漣羣鷗盡驚矯疑是龍吟淵微瀾蕩
餘暉流響散遠煙靜聽意已消何須撫徽絃安得卜此
居一謝塵中緣朝來潭上坐暮向松間眠

夜坐天界西軒

明月出東閣照我坐前軒諸僧夜已定寂寞與誰言煙
漫螢微度風條蟬罷喧清景雖堪悅終嗟非故園

京師嘗吳粳

新秔粲如玉遠漕來中吳初嘗愛精粳想出官田租我
本東臯民少年習耕鋤霜天萬穗熟恣啄從飢烏日暮
刈獲歸妻孥共歡呼茅屋夜春急風雨江村孤晨炊滿
家香薦以出網鱸如今幸蒙恩遨遊在南都門前半區
田別來想已蕪長年盜寸廩補報一事無投匕忽歎息
飽食慙農夫

為因師題松梢飛瀑圖

松風散飛瀑夜作濤聲急棲鷗起空山如驚鬼神入定
僧寂無聽任灑袈裟溼

送周四孝廉後酒醒夜聞鴈聲

別時酒忽醒客去唯空舍風雪鴈聲來寒生石城夜遙
憶渡江船正泊楓林下

答內寄

落月入曉閨相思不須啼我非秋胡子君豈蘇秦妻風
從故鄉來吹詩達京縣讀之見君心寧徒見君面拔草

不易絕割水終難開行雲會有時飛下巫陽臺莫信長
安道花枝滿樓好白馬繫春風離愁坐將老

真氏女

余在史館日談次有言姚文公承旨翰林時嘗
飲玉堂有侍妓閩語者詢之乃真文忠公裔孫
也父為筦庫負縣官錢鬻之以償遂流於娼家
公愍之白於執政落其籍以嫁院吏黃逮逮後
至顯官同館之士聞之多賦詩者余亦為作一

首

妾恨非緹縈上書動天子自鬻償縣官幸得脫父死誰
知故相家失身居狹斜遂令園中柏翻作道傍花當筵
唱金縷朔客驚聞語相問忽相憐開籠放鸚鵡棄置舞
衣裳新理嫁時裝良人身作吏不是販茶商花釵映羅
扇初與郎相見貴賤古難常妾心那敢怨願郎去作官
莫掌官錢穀生子但生男家門免多辱

送李架閣赴山西行省

日暮踰大河北望古晉疆萬里饒風沙地接戎與羌
翩并州兒躍馬能挽強古來事爭奪百戰在此場
聖皇劉羣雄撫劔定八荒睽茲形勝都建侯樹藩方
披榛開幙府賓從皆才良所期偃甲兵民物自此康
山河罷阻險沃野多耕桑君行願努力遠別庸何傷

送王哲判官之上黨

羣材萃京師有若奔海川盍簪向華館唯君最韶年
忽行佐名邦輟理金匱編朝辭紫闕下暮宿黃河壩
馬上

看太行日落萬里煙
峩峩天井闕高城鬱相連
遺氓得少安時清
罷戈鋌亟行勿憚遠
聖意煩承宣

登句容僧伽塔望茅山

高登大士塔遙望仙人峰
茲峰夫何如玉削
三芙蓉雲深句曲樹
日落華陽鐘
長君昔飛昇
駕挾雙白龍
至今學道處
洞府留靈蹤
丹泉夜吐光
瑤草春含茸
仙應笑我愚塵世
苟自容胡不鍊
爾形歸來蔭長松
望仙咫尺間
不隔雲海重
真訣儻肯授
執鞭願相從

贈楊榮陽

嘉陵美山水亦復富文彥揚君產其邦材拔性高狷布
衣走名都早入藝林選客屈稷下談王邀鄴中宴出門
得名聲不假新舊援匣劍未久埋囊錐已先見吐詞實
瑰竒讀者心欲顫刀鳴鬪夫勇花妥笑女倩如觀廣場
中百戲張曼衍平生眼無人遇我獨相善陌頭每竝出
兩騎無後先喜從兔園遊慙受狗監薦君歌我固服我
賦君亦羨墮筵吟帽烏踏席舞裙茜醉中共笑語往往

雜諧諺有時出城西山水恣攀踐巖眠曙猿驚澗飲夏
鶯囀吳宮妓去榭蕭寺僧開殿龍門剝陰苔高什記題
徧歡遊正相酣世事忽驚變朋儔半生死一往如激電
我掉返江尋君車赴淮甸旋聞逐流人居濠又移汴一
身去何賫空橐唯破硯危塗晚行疲欲進足如冒狼來
樹杪避蝎走燈下見渡河自撐篙水急船斷牽及至秋
已深舊褐風裂片難尋高陽飲空帛鄆陵戰聖恩忽加
憐收拔佐山縣卑曹敢云辭執版謁府掾官庖盡炊藜

民賦半輸絹低飛蓬蒿間不異雉帶箭有親寓京師年
老闕供饌欲奉朝夕歡去職胡敢擅晨上宰相書得歸
遂微願上堂具珍鮭呼婦賣釵釧我時別君久問訊愧
無便空題憶君詩細字書滿卷今春被詔起前史預編
撰始來長干門揚柳正飛燕逢君風塵餘不改舊顏面
握手話苦辛悲喜雜慶唁客中雖無錢自寫賒酒券邀
來卧東閣月出初鎖院君言涉艱難壯志今已倦回頭
悟前非更名慕蘧瑗

君近改名去非

我聞崇谿金不畏經百鍊

胡為暫失路遽欲老貧賤吾皇奮神武四海始安奠棧
通諭夷文驛走徵士傳時巡抗霓旌肆觀冠星弁功成
萬瑞集禮欲議封禪君才適時需正若當暑扇手持照
國珠胸出補衮線便應上金鑾立對被天眷嗟余忝載
筆鼠璞難自銜幸茲際昌辰魏闕寧不戀但憂誤蒙恩
不稱終冒譴秋風楚潮滿歸舸帆欲轉君若念故交殷
勤一相餞

寺中早秋

秋風入寺早孤客驚離索斜日數蟲懸槐花雨餘落砧
聲起廢苑簞色淒高閣獨憐明鏡中玄鬢猶如昨

天界翫月

洪武二年八月十三日元史成中書表進詔賜
纂修之士一十八人銀幣且引對獎諭擢授庶
職老病者則賜歸于鄉閱二日中秋諸君以史
事甫成而佳節適至又樂上賜之優渥而惜同
局之將違也乃即所寓天界佛寺之中庭置酒

為翫月之賞分韻賦詩以紀其事啟得衢字云
聖主念前鑒述作徵名儒羣來高館間廁跡愧我愚孰
謂此責輕毫端有褒誅書成進丹陛召對共拜趨去留
雖不同雨露均沾濡已淹三時勞可廢一夕娛况逢端
正月當空照眉鬢流光滿金界境與人間殊廣庭布長
筵嘉肴薦芳腴豈唯多士集亦有名僧俱興酣貴形忘
諧笑不復拘觴行豈辭勤仰看轉斗樞明晨即分袂此
樂誠須臾人生四海間相見皆友于不知誰使令流蕩

無根株忽然此相遇旋復成天隅願各崇令名逍遙步
亨衢明年重見月相憶當長吁

寄題鄞縣青山寺鍾秀樓

東湖秀可攬造化夙所聚間有釋子居雲中構層宇剝
出辨遠岑帆迴識修渚鳥外月上海虹邊樹含雨願言
此登眺去作逃禪侶西崦暮鐘時憑闌共僧語

曉出趨朝

正冠出門早杳杳鐘初歇嘶騎踏嚴霜驚鴉起殘月委

迤度九陌窈窕瞻雙闕長卿本疎慢深愧陪朝謁

送顧式歸吳

顧君野王孫與我生共縣故鄉未曾識却在他鄉見留
連忽東還長揖袖詩卷自言吳中好稻熟湖蠡賤欲卧
煙雨舟醉讀三高傳余方謬通籍講帷近清殿故園豈
不懷君恩正深戀遠欲謝鄉人殷勤附君便

御溝觀鷺

白雪泛金塘羣翻動曙光危棲翹獨趾亂唳引修吭池

中鵠可竝廷內鷺難行自憐觀詠者江湖興未忘

夢姊

我家白頭姊遠在婁水曲昨夜夢見之千里地誰縮不
知別已久尚作別時哭覺來旅齋空風雪灑窻行田家
有弟妹終歲喜相逐我非王事縻胡忍離骨肉城東先
人廬尚有書可讀何當乞身還親為姊煮粥

答定水寺芭公

日晏初出院閒齋一蕭然忽枉名僧書始知在清泉憶

昔雲巖居共締林中緣夏陰繞澗吟秋霽開閣眠睽合
苦難常別來歲頻遷趣同貴道在跡異慙名牽明月出
東海想照空山禪無因荷衣襪往禮高峰前

訓謝翰林留別

啟與同郡謝君徽同徵又同官翰林洪武三年
七月廿八日上御闕樓召對擢啟戶部侍郎謝
吏部郎中俱以踰冒辭即蒙俞允賜內帑白金
放歸於鄉

江左稱謝家奕葉多名人君今復秀發瓊枝邁風塵顧
余忝鄉里才華敢論美丹詔偶見徵雲蘿歛同起謁帝
入九闕咫尺瞻天顏從茲謬通籍接武諸公間朝侍青
坊讀夜陪玉堂宿講罷分御羹吟成刻官燭出入在兩
宮與君無不同自慙本鷗鷺亦得隨鵷鴻朝朝禁門下
聽鷄共騎馬上國多故人情親似君寡竝命超列卿寵
極翻憂驚我叨掌國計君佐持銓衡偕辭向明主叩天
聽天語勅賚內帑金東還特相許拜賜出皇都人言似

兩疏月明照宮錦同棹入中吳吳中故鄉道雨歇秋光
好青山度水迎喜我歸來早落日下長洲分攜忽解舟
如何到家喜却有別君愁別君去還邇只隔吳江水離
思與秋長蘆花三十里來往片帆通相期作釣翁高歌
雖鄙野猶可贊王風

過白鶴溪

昨發白鷺洲今過白鶴溪溪流幾迴轉只在晉陵西月
出女猶浣雲深猿自啼茅峰雖咫尺無計躡丹梯

至吳松江

江淨涵素空高帆漾天風澄波三百里歸興與無窮心
期弄雲月迢遞辭金闕晚色海霞銷秋芳渚蓮歇久別
釣魚磯今朝始拂衣忘機舊鷗鳥相見莫驚飛

始歸田園

辭秩還故里永言遂遐心豈欲事高騫居崇自難任清
晨問田廬荒蹊尚能尋秋蟲語左右翳翳桑麻深別來
幾何時舊竹已成林父老喜我歸攜榼來共斟聞知天

子聖歡然散顏襟相期畢租稅歲暮同謳吟

其二

白露蕪草木荒園掩窮秋歸來一艾理始覺吾廬幽高
柳蔭巷疎清川映門流落日望禾黍離離滿西疇乍歸
意自欣策杖頻覽遊名宦誠足貴猥承懼愆尤早退非
引年皇恩未能酬相逢勿稱隱不是東陵侯

睡覺

爐熏靄宿潤秋滿牀屏裏曙色透窻來幽人眠未起風

驚露樹怯日出煙禽喜却憶候東華朝衣寒似水

與王徵士訪李鍊師遂同過師林尋因公

玄館啟真境紺園閱清香茲晨兩地遊乍出囂煩鄉鳥
鳴桂花落澗戶秋風涼開士演金偈羽人薦瑤觴亦有
詞苑英清芬吐華章愧我自徵起東帶忝周行山林久
在念那期復來翔睽合同固知妄去來亦何常誰言道各
異妙契宜相忘

效樂天

誰言我久賤明時已叨祿誰言我苦貧空倉尚餘粟辭
闕是引退還鄉豈遷逐舊宅一架書荒園數叢菊俗緣
任妻子家事煩童僕性懶宜早間何須暮年促猶著朝
士冠新裁野人服杯深午醉重被煖朝眠熟旁人笑寂
寞寂寞吾所欲終老亦何求但懼無此福功名如美味
染指已云足何待厭飽餘腸胃生痰毒請看留侯退遠
勝主父族我師老子言知足故不辱

新春飲王七孝廉家

凍雨靄江郭寒姿變春華鳥欣已交音梅慘尚閉花此
時高堂上晨起獨感嗟歲換固有常時清樂無涯蕭蕭
風吹巾竹外度遠沙相過偶一醉今夕憐酒家

詠軒

蕭蕭布華榻冷冷罷朱絃臨楹一流睇幽事忽滿前池
草方依微庭柯正蔥芊偶爾發孤詠聊茲寫中愔景融
理自得詎辨媿與妍猶慙至妙意寂寞非言宣

施君眠雲堂

君字可堂眠雲其號也

古舟一高士白雲與之儔性懶復好眠招雲宿林丘下
雲作簾席上雲作衾裯雲去稍舒膝雲來正蒙頭平生
無心夢雨雲兩悠悠自言眠雲樂世無一可侔浩然身
欲飄若乘無倪舟朝至于帝鄉夕返乎仙洲寧知日月
旋但覺乾坤浮天雞叫不醒宵宵空巖幽我觀山川氣
出入不可求或逐鸞鶴翔或從蛟龍遊或為風伯驅狼
藉不得收或遭雨師怒奔走無能休小生膚寸間大覆
遍九州變化實多狀欲筭若費筭奈何一室中爾獨解

使留我行塵務區願出久未由舉足常防危開眼即見
愁不如閉戶眠往尋孔與周愧無山中緣雲肯相從不
惟當去從爾一夢三千秋

卧東館簡諸友生

抱疾卧東城文墨成久荒翔鴻乍流響時菊忽殞芳繁
陰盡不舒何殊懷積傷良儔兼高誼寡昧豈見忘車馬
限泥潦無由接華觴平居歡固難况乃時非康何以度
茲運相勗蹈其常

答張院長雨中見懷

林園寢扉掩閒坐道心生山藥翻寒色塘澗含曉清乍
違枉芳札遠憶愧深情此日知同寂梧窗聽雨聲

暮途書見

暮歸東市門道路聞悲啼駐馬一借問答云征人妻征
人新戰歿飲恨沉黃泥有兒在哺下飢來食無糜誓將
割茲愛棄去從東西我看巢中燕雛長隨母飛皇天仁
萬物兼照理弗違此獨何竒偶不能與之齊躊躇去復

顧使我心肝摧

施澤阻風

客行阻風濤捨舟步江側
荒村經戰餘草木盡愁色
夜投土屋中月出林半黑
燃薪燎我衣炊黍作我食
夜長關塞寒歸夢何由得
遙想倚閨親中宵淚橫臆

送張隱君歸耕西山

山中久無人秋風桂枝衰
朝逢還山客言趨白雲期
人出君乃遁嗟哉此何時
東岡有良田負耒當自治
四體

雖云勞歲晏可免飢而來未能返驅車竟何之

過峽石

青山夾長溪溪上有魚市土門閉落日野氣白於水虎
行車迹外鳥起鐘聲裏吳語問居人到州還幾里

送劉使君

去年送使君路遠已海湄今年送使君路遠復過之路
遠豈足言人遠自可悲夕宴鮮共歡晝出乏竝馳君懷
孰可語予過疇能規此行剖竹符東方撫惇嫠王事正

靡鹽奚暇及爾私但令中弗遷庶以慰所思

送周將軍請老歸耕

鞍馬息戎役筋力喜尚全買牛西岡垂聊復治廢田零
雨何濛濛決流亦涓涓良苗及時新人情一欣然甘此
耕耘勞忘彼富貴妍心同老農夫閔閔望有年家廩儻
得高尚願輸資邊

夜登南樓觀月

迢迢海上樓月出嘗先見吐嶺乍分規臨波已澄練蒼

茫城關閉歷落星河轉
毋違中夜歡皓景應難戀



大全集卷七

欽定四庫全書

集部

大全集卷八

詳校官庶吉士_臣李傅熊

中書_臣劉源溥覆勘

總校官原任中允_臣王燕緒

校對官中書_臣李斯咏

謄錄監生_臣王爾熙

欽定四庫全書

大全集卷八

明 高啟 撰

七言古詩

唐昭宗賜錢武肅王鐵券歌

妖兒初下含元殿，天子仍居少陽院。諸藩從此擁連城，
朝貢皆停事攻戰。岐王已去梁王來，長安宮闕生蒿萊。
天目山前異人出，金戈雙舉風煙開。羅平惡鳥啼初起，

犀弩三千射潮水歸來父老拜旌旗醜酒搗牛宴鄉里
打毬駿馬驕春風錦袍玉帶真英雄詔書特賜誓終始
黃金鏤字旌殊功虎符龍節彤弓矢後嗣猶令赦三死
盡言恩寵冠當時天府丹書未踰此摩挲舊物四百年
古色滿面凝蒼烟天祐宰相署名在尋文再讀心茫然
古來保族須忠節受此幾人還覆滅王家勲業至今傳
不在區區一方鐵人生富貴知幾時泰山作礪徒相期
行人曾過表忠觀風雨斷蘚埋殘碑

太白三章

太白初升北斗落行人早起車鳴鐸豈願身離父母邦
山川路遠非不惡貧賤未知生處樂

太白正高北斗低行人出關雞亂啼他鄉無人是知己
欲歸未歸東復西弊裘愧見家中妻

太白猶懸北斗沒行人衣上霜拂拂下馬飲酒歌苦聲
新豐主人莫相忽人奴亦有封侯骨

江上看花

兩年京師不見花青衫白馬驅塵沙今年江邊偶無事
狂醉爛漫尋春華遊蜂飛蝶日妍暖紅紫正發紛交加
穿蹊每入鄰媪圃叩門或到山僧家漸老都無少年樂
底用簫鼓隨行車攀條繞樹對吟詠不忍歸去至日斜
花應得我相慰賞似笑欲舞爭矜誇我如無花亦寂寞
閉戶有酒誰能賒夜來茅屋卧聞雨曉起走看成咨嗟
飄英墮萼不可綴餘豔只似銷殘霞明知春色不久住
豈料便去難留遮野鶯啼罷一回首恨與芳草盈天涯

中秋翫月張校理宅得南字

八月望夜天如藍
海色卷霧山收嵐
玉盤元沈龍窟底
忽起萬丈誰能探
初來空中光尚溼
嫋娥寒髻風鬢鬢
人言一年此最好
金精水氣秋相涵
小星盡去大星在
芒角欲吐敢與參
天將洗眼照下土
啖食肯縱妖墓貪
穿深窺暗不遺隙
魍魎忌影逃巖嵌
前年客中憶見之
家人怨別方喃喃
荒山不知佳節至
垂首凭案尋書蟬
但怪流輝入敗戶
油燈失燄留孤龕
起行陰林不用炬

剝啄獨叩峯西菴虬蛇亂踏心膽悸怪影走石皆楓楠
即呼道人共載酒放舟直下芙蓉潭翻翻驚鶻落樹杪
吹笛正和烏飛南今年在舍反寂寞暗室困卧如僵蠶
乾愁無端負良夜月固不言我則慚人無賢愚競翫賞
况我清景性所耽忽憶諸君隔河水持被就宿聆高談
為呼老婢掃庭宇一席盤飭梨與柑江城重閉萬家寂
樓鼓近聽纔過三空堦淒其覺露泣虛牖窈窕疑煙含
婆娑欲留月伴影素鸞西下煩停驂明宵復出已難似

動別經歲嗟何堪尊前此月又此客世所難過心應語
關山幾處未解兵擊柝不寐愁丁男南鄰歌舞北鄰哭
月雖同照異苦甘何人為我揮天戈乾坤多難俱平戡
行者得還居者樂清光所及恩皆覃懸知此願未易遂
憂來舉盞從沈酣須臾衆散曉蟲急古桂吹落青毵毵

送王太守遷雲間

男屠猪羊女醜酒共禱神祠留太守太守今年遷大州
除書已下誰能留兩州相去無百里失君應愁得君喜

安得如君數十人一時盡福東南民

謝陳山人贈其故弟長司所畫山水

大髯袖中有盧霍嵐氣噴人寒色薄出贈生絹一幅圖
云是小髯之所作我嘗遊君伯仲間仲今已沒空見山
畫中無限礧礧意使我坐看愁滿顏重厓複澗迷樵路
煙蘿冥冥畫如暮溪閣風生醉客眠野橋月出歸僧度
榭林蒙密楓林高深處似有猩鼯號滿空雲凍動秋思
飛泉落日何蕭騷揮毫若此難再得白鶴何時返鄉國

良工自古多苦心留賞人間賴遺墨南宮北苑皆已仙
此圖與之當並傳坐嗟存歿意難報作歌愧匪瓊瑤篇

書夢贈徐高士

真人高居紫霞房靈津夜灌通桃康其神不彫駐景光
名籍早入丹臺藏道成驂蚪面虛皇凌攝梵炁遨穹蒼
下視羣生墮迷方倏忽起滅更喜傷我嘗夢遊至其傍
廣庭淨發衆妙香仙媛神官儼成行坐考雲笈披琳琅
稽首歸依大醫王願憫濁世同淪亡龍根珍脯不可嘗

但覺凡火燒肌腸身心俱病孰為攘至言授我何敢忘
空山無人覺在牀海月未落天蒼茫佐卿化鶴來吾鄉
朱冠縞衣頽而長篋中活人何所將苓參朮芎枳桂薑
學仙曾聞道非常幸賜大藥和陰陽誓參飛裾上翱翔
人間徧施甘露漿掃除熱惱俱清涼疾苦不生壽無量

劉松年畫

樵青刺篙勝搖槳船頭分流水聲響青山渺渺波漾漾
白鷗飛過時一兩載書百卷酒十壺日斜出遊女兒湖

鄰舟買得巨口鱸醉拍銅斗歌嗚嗚此樂除却江南無
題武昌魏樂所藏畫

楚山遠吐參差碧虛閣開臨繫船石沙樹凋時鄂渚秋
江鷗沒處湘潭夕閣中幽人坐讀書書聲入水驚龍魚
欲吹短笛相尋去黃鶴磯頭好待予

送葉卿東遊

聞君辭家今幾年布衣綫斷芒屨穿江湖夢迴燈火夜
聽雨每憶山中田兵戈忽斷故鄉路雖有兩足歸無緣

上書願雪父兄恥畫地聚米籌山川居然無成困逆旅
白日但看孤雲眠時人不容禰生傲坐客豈信毛公賢
黃金已盡酒徒散壯士反為兒女憐飢吟倚壁氣未餒
有似病鶻棲荒煙却欲南遊探禹穴僕夫整駕雞鳴前
波濤翻江畏飢鱗霧雨連海愁飛鳶相逢誰肯問憔悴
山水自為窮人妍乾坤無家去何止飄泊不異迴風船
區區願君自愛惜今古遇合無非天亂離貧賤何足歎
王孫亦在道路邊我今豈少四方志讀書坐破牀頭檀

恩讐兩無欲誰報送子空歌寶劍篇

題韓長司所藏山水圖

參卿昔在西安幕騎馬看山時出郭終南泰華勢最高
橫作秋雲掃寥廓秦川漢苑萬里開酒醒望遠登荒臺
日斜渭上歸人渡岳暗關中飛雨來此處竒觀絕天下
何事歸來猶看畫畫中小景似江南黃葉漁村見煙舍
莫戀江南真故鄉尊鱸炊熟酒船香美人不是滄洲客
去去宜登白玉堂

煮石山房為金華葉山人賦

山人不飯粳稻香笑指白石為餽糧金華之石猶可食
元是舊牧初平羊荆榛拾歸夜深煮自言久服能輕舉
但令隨處有雲根不問青天早無雨我生無力耕西疇
硯田欲枯抱飢憂便當從君學此術絕勝乞米監河侯
九日與客登虎丘至夕放舟過天平山

昨日風雨今日晴天意令人作重九登高未用憶龍山
弔古竟須尋虎阜秋清人稀葉滿寺履齒無聲石苔厚

我來但欲問前王不知伯氣銷沈久下穿山骨葬弓劍
銀海夜寒空不朽樓臺荆棘今幾變英雄誰似青山壽
十年自歎在塵土雞鳴起逐途人走茲遊喜出世網外
相攜況是同心友盤梯共上峰頂塔欲觀東海攀北斗
中原不見鴻鴈來浮雲萬里空回首鐘聲催送晚出寺
棲鴉已滿祠前柳秋風吹林客醉時夕陽下嶺僧歸後
山留好月續清景乘興夜過漁村口放船不覺露沾衣
滅燭始看星在留金陵酒熟來謫仙赤壁歌殘泣嫠婦

人生此樂信難得夢幻功名有時有他年何必問誰健
但令不負持螯手詩成底用刻山石為寄龍門說空叟
明朝來借白雲泉淨洗從前千劫垢

夜發錢清

錢清渡頭船夜開黃茅苦竹聞猿哀客官醜酒水神廟
風雨滿江潮正來蒸飯炊魚坐蓬底不覺舟行兩山裏
棹歌早過越王城東方未白啼鴉起

草書歌贈張宣

昔聞汝祖東吳精醉傳草聖醒而精汝今能飲不滿杓
逸氣欲與相崢嶸高堂把筆若把槊長綃一拂悲風生
陰垂大澤雷雨過響破巨峽波濤傾颺颺遊絲罨晴晝
落落高斗回寒更飲猿連臂深澗絕飢鶻捩翅荒煙橫
自言靜裏觀萬物故能變化窮其情嗟余少本好劒舞
學書晚方從父兄終焉懶情不得就塵滿硯田長廢耕
覽時撫事每有感胸次砢礪何由平空齋往往出怪語
吟聲相應飢腸鳴篇成請君為我寫墨瀋灑壁從奔崩

是時黃雲閉歲暮返照忽出寒江明手隨意到不留阻
正似突騎陰山行今巖不聞戈甲響一夜下盡名王城
安得師行亦如此頃刻坐見乾坤清嗚呼作歌聊贈汝
愈使流淚沾衣纓

獨遊雲巖寄周砥

城西諸山非不奇我遊獨與茲山宜紅櫻春開山後寺
白水夏滿山前陂幽居況與山不遠鐘鼓每到空齋帷
雨餘煙中落日下曳杖往讀頭陀碑兩厓蒼蒼石色古

枇杷樹高陰滿池，殿燈欲昏上羣鼠。塔鈴已靜蹲孤鷗，
興來即遊興盡返。迎送豈要山僧知，困窮喪亂豈無感。
正賴此境忘吾悲，嗟君何為乃自苦。破鞵短策塵中馳，
挂帆能來亦未晚。浦口三日南風吹。

練圻老人農隱

我生不願六國印，但願耕種二頃田。田中讀書慕堯舜，
坐待四海昇平年。却愁為農亦良苦，近歲征役相煩煎。
養蠶唯堪了官稅，賣犢未足輸丁錢。虬鬚縣吏叩門戶，

鄰犬夜吠頻驚眠雨中投泥東鑿塹冰上渡水西防邊
幾家逃亡閉白屋荒村古木空寒煙君獨胡為有此樂
無乃地邇秦溪仙門前流水野橋斷不過車馬唯通船
袂風初涼近芒種戴勝曉鳴桑樹顛短衣行隴自課作
兒子饑後妻耘前白頭雖復勞四體若比我輩寧非賢
旅遊三十不稱意年登未具粥與饘便投筆硯把耒耜
從子共賦幽風篇

嘗蒲萄酒歌

西域幾年歸使隔漢宮遺種秋蕭瑟誰將馬乳壓瑤漿
遠餉江南渴吟客赤霞流髓濃無聲初疑豹血淋銀甕
吳都不數黃柑釀隋殿虛傳玉薤名聞道輪臺千里雪
獵騎弓弦凍皆折試唱羌歌勸一觴氈房夜半天迴熱
絕味今朝喜得嘗猶含風露萬珠香牀頭如能有五斗
不將輕博涼州守

送高二文學遊錢塘

君梁人與余異譜

我家本出渤海王子孫散落來南方只今遙承幾世後

坐棄戰陳談文章嗟君渡江此相遇知有遠族猶居梁
嘗聞四海盡兄弟況我同姓能相忘十年近舍道南宅
歲時拜父登高堂君年雖少志則壯不肯與世相低昂
讀書閉閣人罕識明月夜照聲琅琅欲將古道共推挽
豈顧薄俗譏迂狂君來不欲是王式我行或止非臧倉
亂離正賴相慰藉何事遠別遊錢塘錢塘舊國我所到
江山自存人已亡鴈鷺長雲暮陂澹牛羊落照秋陵荒
繁華銷盡莽蒼出君行見此能無傷西風吹塵扇難障

不如歸卧須時康一飢小事何足道故國尚有霜英黃
贈李外史

仙人飄飄若雲風來去倏忽誰能窮豈唯上界足官府
往往亦在塵埃中我欲尋真向五岳亂後舊路迷榛蓬
天雞未明夜谷暗海鶴已去秋壇空丹厓碧澗瑤草歇
洞府一闕無由通陌頭驚逢李道士自說柱史為吾翁
傍人相傳解起死袖裏有丹如日紅我聞安期古策士
親見楚漢爭雌雄終然濁世不肯住渡海竟去先飛鴻

玄洲東望纔咫尺彩霞幻結金銀宮何當共赴食棗約
三花醉折春濛濛迴看城郭煙霧杳大笑下士真沙蟲

聽教坊舊妓郭芳卿弟子陳氏歌

時至正己亥
歲作

文皇在御昇平日上苑宸遊駕頻出仗中樂部五千人
能唱新聲誰第一燕國佳人號順時姿容歌舞總能奇
中官奉旨時宣喚立馬門前催畫眉建章宮裏長生殿
芍藥初開勅張宴龍笙罷奏鳳絃停共聽嬌喉一鶯囀
過雲妙響發朱脣不讓開元許永新繡陞花驚飄豔雪

文梁風動委芳塵翰林才子山東李每進新詞蒙上喜
當筵按罷謝天恩捧賜纏頭蜀都綺晚出銀臺酒未消
侯家主第強相邀寶釵珠袖尊前賞占斷春風夜復朝
回頭樂事浮雲改瘞玉埋香今幾載世間遺譜竟誰傳
弟子猶憐一人在曾記霓裳學得成朝元隊裏藝初呈
九天聲落千人聽丹鳳樓前月正明狹斜貴客迴車馬
不信芳名在師下風塵一旦禁城荒誰是花前聽歌者
從此飄零出教坊遠辭京國客殊方閉門春盡無人問

白髮青裙不理妝相逢為把雙蛾蹙水調梁州歌續續
江南年少未曾聞元是當時供奉曲朝使今年海上歸
繁華休說亂來非梨園散盡宮槐落天子愁多內宴稀
始知歡樂生憂患恨殺韓休老無諫傷心不見昔人歌
汾水秋風有飛鴈此日西園把一卮感時懷舊盡成悲
含情欲為秋娘賦愧我才非杜牧之

牀屏山水圖歌

畫工知余愛青山久墮塵網無由還故將列岫寫屏障

使我卧起於其間從此長如宿清境枕上分明見峰嶺
爐煙曉入帳中飛擁被驚和白雲冷丹崖碧樹層層開
江雨遠逐孤帆來就中樓閣是何處彷彿神女巫陽臺
楚山修竹瀟湘水似有清猿忽啼起江南千里夢遊歸
半牀落月高堂裏

方隱君山園

吳興城南山水勝竹樹參差萬家暎幽深誰似隱君園
車馬不來雞犬靜兩溪迴通柳港曲一峯立對柴門正

東西別墅憐更好孤棹往來隨晚興總令種菜不種桃
新製長鑿木為柄家童不解候天時鄰叟還能論地性
交交林路翳復開活活野泉流不定清晨聞鳥欣獨往
濃綠潑晴畦色淨老葉垂根孤蚓號殘英綴梗羣蜂競
乍繁新蔓喜籬長欲迸晚芽嫌土硬此時採擷自足飽
肯為食肝煩縣令古來名園悉可數金谷辟疆誇獨盛
鑿石圓開弄月池買花深作行春徑愛妾宵陪秉燭宴
狎朋晝接流觴詠長年歡樂豈知極迴首芳菲屬他姓

只今誰解問遺蹤
斷甃摧垣無一剩
乃知厚業要德守
那得衰榮但言命
君能勤儉遺子孫
應有佳名書郡乘
觀顧蕃所藏宋賜進士絲鞭歌

臚傳殿下呼名士
進士新充探花使
內人綰結綵鞭成
恩與宮袍一時賜
不用頻將柳下揮
馬蹄得意自如飛
影裏夕陽何處去
曲江園裏宴初歸
天街直拂花枝過
擇塔高樓彩毬墮
令人把玩憶當時
零落春風幾縷絲
憶昨行寄吳中諸故人

憶昨結交豪俠客意氣相傾無促戚十年離亂如不知
日費黃金出遊劇狐裘蒙茸欺北風霹靂應手鳴雕弓
桓王墓下沙草白彷彿地似遼城東馬行雪中四蹄熱
流影欲追飛隼滅歸來笑學曹景宗生擊黃獐飲其血
臯橋泰娘雙翠蛾喚來尊前為我歌白日欲沒奈愁何
迴潭水綠春始波此中夜遊樂更多月出東山白雲裏
照見船中笛聲起鷺鷥飛過片片輕有似梅花落江水
天峰最高明日登手接飛鳥攀危藤龍門路黑不可上

松風吹滅巖中燈衆客欲歸我不能更度前嶺緣峻嶒
遠攜茗器下相候喜有白首楞伽僧館娃離宮已為寺
香徑無人欲愁思醉題高壁墨如鴉一半欹斜不成字
夫差城南天下稀狂遊累日忘却歸座中爭起勸我酒
但道飲此無相違自從飄零各江海故舊如今幾人在
荒煙落日野烏啼寂寞青山顏亦改須知少年樂事偏
當飲豈得言無錢我今自筭雖未老豪健已覺難如前
去日已去不可止來日方來猶可喜古來達士有名言

只說人生行樂耳

明皇秉燭夜遊圖

華萼樓頭日初墮紫衣催上宮門鎖大家今夕燕西園
高熱銀盤百枝火海棠欲睡不得成紅妝照見殊分明
滿庭紫燄作春霧不知有月空中行新譜霓裳試初按
內使頻呼燒燭換知更宮女報銅籤歌舞休催夜方半
共言醉飲終此宵明日且免羣臣朝只憂風露漸欲冷
妃子衣薄愁成嬌琵琶羯鼓相追續白日君心歡不足

此時何暇化光明去照逃亡小家屋姑蘇臺上長夜歌
江都宮裏飛螢多一般行樂未知極烽火忽至將如何
可憐蜀道歸來客南內淒涼頭盡白孤燈不照返魂人
梧桐夜雨秋蕭瑟

黑河秋雨引賦趙王孫家琵琶蓋其名也

朔天夜裂天垂泣雲壓鷹低翻翅溼髯王醉影抱寒鷺
檀殿嘈嘈箭鳴急紅冰淚落清燈下倒卷河流入絃瀉
瘦駝卧磧歇鈴車撲朔陰沙鬼行野漢魂私語髻風淒

都護營荒咽凍顰蘭山木葉連愁起散入塞門三萬里
夢斷金蟾隔煙小青塚埋聲秋不曉

期張校理王著作徐記室遊虎阜

前身似是雲水僧餘習愛覓名山登最憐虎阜在平地
一丘勢敵千峻嶒缺厓深深翳密葉欹石兀兀纏危藤
昔年無事恣幽賞拄杖叩門來屢曾風廊聽竹移廣簟
雪屋煨芋明高燈禪堂素壁醉題滿老衲喜客無嗔憎
別來三載困塵土散落略盡同遊朋谷猿清叫烟霧隔

宵夢欲往天曹曹幽懷鬱抱不得寫一月雨聲眠枕肱
相親尚有北郭友材盡齊楚慙曹滕張君名駒稟神駿
王子快鶻生鋒稜並淹客館校遺籍雲路萬里違騫騰
徐卿亦是瑚璉器遠役又欲行擔簦明朝山鵲定鳴霽
跬步可遊何不能一林一澗幽景在遙想與昔無虧增
朱櫻綠筍雖已過正愛夏木陰層層欲營此行況甚易
婦有藏酒魚新罾出城不必借車馬已辦布韉青行滕
吾儕雖窮自有樂相聚豈比蟲蝼亂離撥棄且勿道

願賦妙語留傳騰

廣陵孫孝子愛日堂

昔自中原兵甲動志士憂時久心痛千村殺戮雞犬無
骨肉誰家保相共揚州受禍聞最深徒恃堅城鐵為甕
城中義丁一百萬坐委溝谿不成用至今草長觸髅臺
月黑精靈尚哀慟君時負親獨竄匿何異網魚逢脫縱
遠道秋風舊橐空長江暮雨孤帆重竭來吾鄉今十年
孝友爭傳比張仲雖嗟故里未能歸却喜新堂還可奉

盡歡惟歎小人羹致養寧須大官俸只愁老景苦駸駸
義馭西馳疾飛鞚晝看花影願遲移晚聽角聲驚早弄
長繩未解繫飛鳥每計餘年憂且恐嗟余少已失庭闈
宰木亂來無地種欲娛朝夕難再得誰惜流光去如夢
自慚不及君慶多灑淚蓼莪空廢誦寸心猶願時早平
重為河清作歌頌萬國同看化日長生能養親死能送

贈胡校書奎

我初遇子東海濱苧衫席帽凌風塵登城觀濤共歎息

見者不識何如人歸時憶近看燈節孤舟夜過黃岡雪
書來書往道加餐幾日相逢五年別再會之計何悠哉
我未及去君能來秋風吹殘太湖水乘興上得吳王臺
吳王臺前白楊柳西施去後吳娃醜四海同為此地人
百壺獨買誰家酒更尋豪客作夜遊簸弄明月琵琶洲
有愁為君亦蕩滌何況我輩元無愁醉中狂談君可恕
且共周旋莫歸去秋光已算逼重陽好為黃花三日住

溫陵節婦行

泉州陳氏婦夫泛海溺死守志

妾家溫陵近南浦嫁得良人業為買良人長年愛遠遊
不敢新妝映門戶販寶遙聞去百蠻朝朝海上望青山
不仁無那蛟龍橫漂沒孤舟不得還君非渡河老狂父
波濤如山何不顧尋屍便欲赴窮淵膝下嬌兒誰與哺
十載空闈守寸心滄溟水淺恨情深願身不化山頭石
化作孤飛精衛禽

答余左司沈別駕元夕會飲城南之作時在園

中

青帝行春氣初播雲沍餘陰苦難破江頭碧草生未長
戰馬寒嘶齧殘莖炊煙冷落雨中溼鄰屋時聞有啼餓
我愁鬱鬱但欲眠肯以案書勤自課却思去歲屬無虞
元夕共歡人幾箇高堂細聽落梅歌手擘黃柑香噴座
客酬主勸總忘曉看盡繁燈逐星墮祇今照市但羣烽
樂事淒涼誰復作故人念我有二子省内郎官府中佐
別離兩月不相逢身佩弓刀從戍邏欲尋舊賞慰勞役

笑拂尊前且安坐老兵折簡走相呼謂我閉門無乃懦
黃昏遠就向城南敢惜春衫凍泥浣軍中有會異尋常
牛肉麤肥酒卮大胡奴帳下出琵琶復拊銀箏與相和
燭殘未聽荒雞號絃斷忽驚哀鴈過須臾顏熱起叫噓
不記亂離仍轆軻更聲折折繞旗門劔匣揩頭容醉卧
歸來又辱寄新詩錦水煎腸珠落唾豪吟自欲繼燕歌
悲調豈將同楚些覽之幾度感深情曲高和難非懶惰
我生無力本何用衣食自來供馬磨雖蒙鄉曲假虛名

正似南箕不堪簸君才於世俱可珍周賈東遊抱竒貨
艱危壯氣喜彌激利器未施寧忍挫頗聞原野多殺傷
風雪呻吟苦無那吾儕斯樂豈易得應愧皇天恩獨荷
明年此夕會昇平把酒相邀更相賀

江上晚過鄰塢看花因憶南園舊遊

去年看花在城郭今年看花在村落花開依舊自芳菲
客思居然成寂寞亂後城南花已空廢園門鎖烏聲中
翻憐此地春風在映水穿籬發幾叢年時遊伴俱何處

祇有閒蜂隨繞樹欲慰春愁無酒家殘香細雨空歸去
兵後逢張孝廉醇

前年遠別君父子遭亂相傳皆已死今朝南陌忽逢君
為識人中語音似君言從親渡海濤欲避兵禍辭官曹
間關僅得返鄉里脫命羅網真秋毫問我胡為亦憔悴
十月孤城陷圍內寤難兩地得俱全政荷皇天憐我輩
相看握手非偶然痛飲豈得愁無錢城中故舊散欲盡
君來使我忘憂悵還思當年事未改車馬紅塵浩如海

等閒列第化秦灰試問主人誰復在請君看此應感吁
世間富貴皆空虛客遊且莫更彈缺讀書歸卧先人廬
夜飲丁二侃宅聽琵琶

江月未出明星懸主人飲客夜不眠坐呼伶兒撥四絃
龍頭高撚玉軫圓轉關未奏渡索先勞嘈咽切斷復連
澀如清澗溜凍泉細若碧樹吟秋蟬忽然繁急何轟闐
風沙滿把撒四筵鴈行驚起飛不聯浮雲落葉俱綿綿
一聲抹斷萬里烟夢入紫塞愁胡天問渠怨恨有幾千

口不能說指為傳令人帳望思往年梁園楚榭長周旋
帷中曲宴羅綺鮮夜遣飛騎迎蟬娟低鬟出拜絳燭前
文絲香條搭左肩曲項紫鳳抱半偏楓香一調妙入玄
好手正可羞紅蓮座間豪客皆詞仙舉盃邀我賦長篇
贈之醉寫蜀錦牋可當十萬纏頭錢如今遠客江海邊
欲聞絲音久無緣故人已散陵谷遷生死流落俱堪憐
今宵聽此真偶然顧影憔悴非昔妍長河欲曙落遠川
暫當歡娛反憂煎向隅無言涕淚連此身如在潯陽船

曉睡

野夫性慵朝不出，弊箒蕭然掩閭室。
村深無客早敲門，睡覺長歌半簷日。
林聲寂寂鳥鳴少，窓影交交樹橫密。
此時欹枕意方恬，一任牀風亂書帙。
昔年霜街踏官鼓，欲與羣兒走爭疾。
如今只戀布衾溫，悟從前計應多失。
厨中黍熟呼未起，妻子嗔嘲竟誰恤。
天能容老此江邊，無事長眠吾願畢。

東池看芙蓉

江天搖落逢秋杪，滿目殘荷與枯蓼。東家喜有木芙蓉，
幾樹繁開依綠沼。穠豔低將流水映，寒香遠逐迴風裊。
半愁霜露倚蒹葭，老去徐娘猶窈窕。天公似厭秋冷淡，
故發芳叢媚清曉。莫嗟不及見陽春，車馬塵埃相汙少。
吳王宮廢斷行客，湘女祠空掩啼鳥。何如此地獨來尋，
靜對嬋娟散憂悄。蘭舟雖無美人採，日暮孤吟自行繞。
明朝重到恐消魂，零落紅雲波渺渺。

謝廬山宋隱君寄惠所製墨

瓦篝自掃煙埃溼風雨空山杵聲急香爐峰前五粒松
燒成片玉玄香濃寄我團團未磨缺有如蝕盡天邊月
陶泓日暖水滿池雲氣忽起秋淋漓茅屋光寒客心懼
上有蛟龍欲飛去便思寫檄驚天驕夜磨楯鼻冰不銷
又思作賦獻天子曉出洛陽價增紙我今年少多不才
兩事未能如墨何但學顛狂如醉旭頭髮可濡秋未禿

美人撲蝶圖

花枝揚揚蝶宛宛風多力薄飛難遠美人一見空傷情

舞衣春來繡不成
乍過簾前尋不見
却入深叢避鶯燕
一雙撲得和花落
金粉香痕滿羅扇
笑看獨向園中歸
東家西家休亂飛

次韻周誼秀才對月見寄

空林鶴鳴草堂靜
桂影亭亭月初正
憐君幽卧對中秋
尊酒無人起相命
夜深詩成遣寄我
自訴窮愁兼疾病
嗟余比君愁更多
舊感新憂來每併
前年看月綠茗園
賓客當筵一時盛
自吹橫笛倚清歌
痛飲不知瓶屢罄

去年園中在北郭何異孤豚落深窞登樓強欲攬清輝
刁斗連營不堪聽今年旅寓向江渚暫喜東南亂初定
間來未厭戶張羅貧去唯愁室懸磬牧兒耕叟共來往
那得衣冠解相敬久居村野坐自鄙銷盡豪懷與狂興
風塵無復舊時顏愧見相逢問名姓朋友凋零江海空
弟兄離隔關山迥良宵佳月雖可賞羸影窓間竟誰並
迢迢河轉漏初長撼撼葉鳴風稍勁此時倚壁自孤吟
只有蛩聲與相應初疑此月定非月應是人間照愁鏡

還思人愁月豈知何苦多憂損情性一生能幾見此月
盛年若去尤難更明宵圓景未便虧落盡芙蓉江色淨
君能強起從我歡共入空明恣游泳直期枕藉向舟中
不管遙天垂斗柄

大全集卷八

欽定四庫全書

大全集卷九

明 高啟 撰

七言古詩

姑蘇臺

金椎夜築西山土，催作高臺貯歌舞。
文身澤國構王基，却笑先人獨何苦。
銅溝玉檻成繁華，幻出峯頭一片霞。
望處直窮三百里，役時應發幾千家。
蟠空曲路迷仙仗。

攀盡瑤梯纔到上外繞雕龍宛轉欄中施繡鳳葳蕤帳
熏爐長熱鬱金香共道千齡樂未央茂苑月來秋佩冷
洞庭雨過夏綃涼當窓衆妓如仙女揚袂迎風欲輕舉
人從天上見經過烏向雲間驚笑語日暮橫塘花盡開
捲簾臺上望王來宴舟初自觀魚返獵騎還從射鹿迴
從登不用持鉞隊自列紅妝侍高會香傳羅帕進黃柑
縷切鸞刀供玉餚燭光遠落太湖波驚起魚龍出沒多
城上烏啼河漢轉此時誰問夜如何管絃嘈嘈聒人耳

不聞兵來渡谿水欲攜西子走登舟醉倚畫欄嬌不起
瞋目無因到甬東可憐一炬綺羅空獻楣竟墮讎人計
賜劍應辜諫士忠客來試問遺宮路物色荒涼總非故
攘衣始信不虛言滿地荆榛見零露當年爭奪苦勞機
却把江山付落暉聞說越王臺殿上如今亦有鷓鴣飛

百花洲

吳王在時百花開畫船載樂洲邊來吳王去後百花落
歌吹無聞洲寂寞花開花落年年春前後看花應幾人

但見枝枝映流水不知片片墮行塵年年風雨荒臺畔
日暮黃鸝腸欲斷豈惟世少看花人縱來此地無花看

香水谿

粉痕凝水春溶溶煖香流出銅溝宮月明曾照美人浴
影與荷花相間紅玉肌羞露誰能見只有鴛鴦窺半面
絳綃圍掩怯新涼歸卧芙蓉池上殿空洗鉛華不洗妖
坐傾人國幾良宵驪山更有湯泉在千古愁魂一種銷

太湖石

沒人采石山根淵投身下試飢蛟涎馮夷不解護潛寶
幾片捧出如青蓮寒姿本是湖水骨波濤激擊應千年
初疑鬼怪離洞府珊瑚鐵網相鈎連巖空突兀多異態
雲吐夏浦芝生田龍麟含雨晚猶潤豹質隱霧朝常鮮
清音叩罷磬韻遠微靨洗出珠窩圓坐移各岫置庭砌
日照彷彿生紫烟三峯削成泰華掌一穴透入仇池天
醉中時到倚蒼蘚秋風冷逼吟詩肩洛陽園墅汴宮苑
當時駢列誇竒妍黃羅封蓋素氈裹萬里貢獻勞車船

奢游事歇家園廢盡仆荆棘荒池邊人生嗜此亦可笑
有身豈得如石堅百年零落竟誰在空品甲乙煩題鐫
又嗟此石何獻巧自名鑿取虧天全不如頑礦世所棄
滿山長作牛羊眠

洞庭山

朝登西巖望太湖青天在水飛雲孤洞庭縹緲兩峯出
正似碧海浮方壺嘗聞此山古靈壤蛇虎絕跡歡樵夫
濤聲半夜恐魂夢石氣五月寒肌膚居人彷彿武陵客

戶種橘袖收為租高風欲起沙鳥避明月未出霜猿呼
中有林屋仙所都銀房石室開金鋪羅浮峨嵋互通達
別有路往非人途天后每降龍垂胡神鉦忽響驚棲颯
自懸日月照洞內古木陰蔽空朝晡風吹白芝曉易老
雲帶紫泉秋不枯靈威丈人亦仙徒深入探得園中符
玄衣使者不暇惜欲使出拯蒼生蘇後來好事多繼往
石壁篆刻猶堪摹千年玉鼠化蝙蝠下撲炬火如飛鳥
玄闕拒閉誰復到似怪衣上腥塵汙勿言神仙事恍惚

靈蹟具在良非誣我生擾擾胡為乎坐見白髮生頭顱
久欲尋真未能去拘束世故緣妻孥何當臨湖借魚艇
拍浪徑度先雙鳧獨攀幽險不用扶身佩五岳真形圖
夜登天壇掃落葉自取薪水供丹爐此身願作仙家奴
不知仙人肯許無狂語醉發應盧胡

聖姑廟

湖心湧出龜頭山白波翠島非人寰清虛宜作水仙府
鱗堂荷屋居其間淵都羣靈孰為主煙鬢翛然一神女

柔姿誰敢狎相親笑叱鼉龍起雷雨玉骨蟬輕蛻幾秋
世緣已斷信無愁采蘭每約湘濱會拾翠時陪漢上游
水禽翔鳴衛芝蓋長在蒼茫杳冥外鮫人獻綃裁作衣
螺女供珠綴為佩花落間祠謝古春蕙幃瑤席掩香塵
空山夜夜星河遠芳渚年年蘅杜新霞舒霧捲凝光彩
笑語無聞復誰待冷風幾度引舟迴宛似蓬萊隔煙海
猿叫楓林魚躍波桂旗翻翠暮寒多女巫佇望飛羃度
獨奏箜篌引曼歌椒觴奠罷沈玄壁鳥沒遙天湛空碧

遺情不結楚臺雲世人何處尋踪跡

蔡經宅

昆侖主者王方平身騎黃麟朝紫京舉手長辭漢公卿
得道不願世上名往來隱玄與朱明洞中各有白玉城
絳衣游空擁幢旌三山五嶽自按行冷風吹動天樂鳴
璫簫琅璈和鸞笙羽衛蹴踏山海崩龍車鶴馭紛相迎
嘯呼神官走吏兵魑魅魍魎號且驚暫來經家駐雲程
人馬不見但有聲虎頭鞞囊佩蒼精神光赫然照軒楹

授以至言可長生凡骨已作蟬蛻輕麻姑來會尋仙盟
芳姿娉婷似飛瓊言從昔年宴蓬瀛又見弱水三淺清
爪可爬背念始萌仙意已識遭笞榜餘抗阿姥酒罷傾
攝景忽去煙雲橫家人悲望空惻惻桑田迴首幾變更
神仙在世每自呈凡夫不識等瞽盲丹元有田不解耕
但愛狗苟還蠅營榮華未滿咎責盈忽化腐鬼歸荒塋
金丹可學道可成木鑽石盤貴精誠誰能自拔水火坑
飛游往來瑤樹英千載或有歸來情

石崇墓

虬鬚欲怒珊瑚折步障圍春錦雲熱真珠換妾勝鷺鴻
笑踏香塵如踏空酒闌金谷鶯花醉家逐樓前舞裙墜
財多買得東市愁羅綺散盡餘荒丘猶憐白首同歸者
坐伴遊魂楓樹下

初入京寓天界寺西閣對辛夷花懷徐七記室

去年寺裏開辛夷君來憶我曾題詩今年我來君已去
思君還對花開時欲尋花下君行迹日暮空庭古苔碧

殷勤把酒問花枝
看過春風幾行客

答余新鄭

前年吳門初解兵
君別故國當西行
有司臨門暮驅發
道路風雨啼孩嬰
倉皇不敢送出郭
執手暫立懷憂驚
我時雖幸脫鋒鏑
亂後生事無堪營
移家江上託地主
閒園借得親鉏耒
耕春朝起沐日照
屋野卉雜發鳴鸝鷓
思君萬里不可見
對此涕淚如盆傾
有壺當軒忍自酌
有句在卷邀誰評
走投北郭問消息
一客為我言分明

君初隨例詣闕下有旨謫徙鍾離城賫無囊金從無僕
棄家獨去何惻惻長淮粘天趣前渡牙眼怖客浮鼉鯨
到州鞠躬謁太守脫去官籍儕編氓城荒無屋寓來客
旋乞廢地誅蓬荆異鄉何人恤同患喜有楊子兼徐卿
日高破竈煙未起閉戶不絕哦詩聲去年聖恩念逐客
特賜拂拭加朝纓勅君赴汴聽銓擢路筭舊驛猶千程
沙河無雨夏雲熱茅葦夾岸多蚊蟲舟中感癘得下泄
刀攪腸腹聞唧嚶荒途無藥相救療伏枕兩旬幾殞生

終藉神明佑吉士疾勢漸脫身強輕一官署作新鄭簿
捧檄已去詢田更我雖歷歷聽客語虛實未察憂難平
初春天子下明詔欲纂前史羅儒英菲才亦辱使者召
辭謝不得來南京日斜出局訪君舍草滿陋巷春泥晴
入門小女識父友延拜學訴艱難情且云父意念家遠
新遣兩卒來相迎須臾出君寄我札上有秀句如瑰瓊
自陳前事頗一一與客舊說無虧盈讀終呼卒問彼土
卒言幾年經戰爭河山蕭條縣雖小民少奸詐多淳誠

春秋古稱鄆子國溱洧水活魴魚蘋雌兔咻咻草間走
雄雉角角桑顛鳴谷深稀逢種田者時有射戶棲山棚
霜天赤棗收幾斛剥食可當江南抗官來撫民務無事
鞭挂壁上無敲榜寒廳吏散獨坐嘯遠對嵩少當檐楹
聞之離抱頓舒豁如吸清露醒朝醒便因卒還寄君語
此邑小鮮聊試烹幸逢昌朝勿自棄願更努力修嘉名
吾皇親手擁高簪洒掃六合氛塵清海內夷筐已入貢
隴外戶版初來呈大開明堂議禮樂學士濟濟登蓬瀛

大廟冬烝薦朱瑟千畝春藉垂青絃用材不肯略疏賤
銖寸盡上天官衡況君磊落抱奇器不異一鶚秋空橫
豈容久屈簿領下天道始塞終當亨文章期君歸黼黻
借問報政何時成

送林謨秀才東歸謁松江守

江城秋陰朝不暉落葉古巷人來稀林生何求乃過我
敗屐躡雨投閒扉自言少習澤宮射思侶聚士登王畿
風塵失路因漂轉我豈無志時其違欲充材官挽強弩

闔塞莫解窮城圍將從隱者服短褐霜露難采荒山薇
長年旅舍破氊冷坐厭蟋蟀愁伊威諸侯得意盡輕客
顧影竟傍何門依南津昨夜砧杵動風來燭前驚攬衣
家人倚戶望應久宿春未辦悲慙歸今朝江帆偶東轉
願借子語為光輝嗟余亦坐窮作崇讀書不出遭罵譏
士無賢否貧者鄙此言信矣誰云非囊乏黃金可揮贈
有詩豈救君腸飢雲間使君本儒者貴顯尚肯矜寒微
儻開深池養病鵠翼成待看摩天飛

題高彥敬雲山圖

尚書生長燕臺下，慣識風沙草漫野。
何由得見山水鄉，煙嶺雲林遠能寫。
平時四海作宦遊，高興最愛江南秋。
雲谿清曉剡谿晚，閒解狂轡尋扁舟。
此中謝屐曾經處，半是啼鴉棲宿樹。
斷橋旗下問農歸，遠寺鐘邊訪僧去。
風流一沒歲未遙，坐覽遺迹成前朝。
何當遍覽畫中景，聖恩已許從漁樵。

美人摘阮圖歌

圓槽象月修寒玉暗貯宮商滿空腹美人
和恨抱秋風
偷寫琴中舞鸞曲傾鬟低黛幾娉婷夢約
湘娥倚竹聽
滴盡冰盤老蛟淚阿咸帳底醉初醒梧桐
落翠萎蘭紫
仙澗流雲含玉子甲屏難障夜深寒恐踏
驚鴻忽飛起
不識人間出塞聲瑤臺別有斷腸情調終
人去哀絃歇
掛樹烏啼滿山月

贈丘老師

長春之孫自仙骨袖有蟠桃食遺核平生
不學燒汞方

唾視黃金等何物滿城誰識舊庚桑白髮人中似鶴長
時上高樓惟獨醉榴皮書破壁塵香

玄武門觀虎園

目光燿燿卧深園羽林獵士初擒獻腥風一嘯猶辟人
況在空山道中見莫憶橫行藜藿間且隨玄豹守天關
垂頭食肉嗟何補漢家將軍乃真虎

送許先生歸越

天子下詔徵賢良多士競逐風雲翔先生亦隨使者起

闕下再拜陳封章自稱前朝老進士白髮已短材非長
羣龍在廷翊昌運疲蹇豈足追騰驥乞還山林養餘齒
歌頌聖德傳無疆近臣上殿為陳請天語特許歸其鄉
是時海國風雨涼道士莊下初栽秧故山農事不可緩
歸興倏與高帆揚從容進退遂所願帝恩甚大誰能量
嗟余相逢恨苦晚忽去未免私心傷明朝相憶望於越
江水東逝何洋洋

送證上人住持道場

訖公昔年住寶坊龍象蹴踏騰毫芒袈裟曾侍玉座傍
萬衆闐聽講仁王弟子如雲來四方朝鐘暮鼓鳴高堂
西歸葱嶺今幾霜鉢傳曇師道彌昌叢林主教遇聖皇
紫衣朝闕隨班行上人繼吐三葉芳衲中長繫摩尼蒼
人間萬念俱已忘獨好遊戲談文章我來京師寄禪房
每邀看月開修廊手橫蠅拂坐繩牀竹間風吹煮茗香
侍僮觸屏睡欲僵高殿宿鳥驚琅璫詩成金磬韻尚揚
清才未必慙支湯有時夜剪園韭嘗燈懸西齋雨浪浪

人生聚散不可常翩然東遊主道場道場乃在雲水鄉
碧瀾堂前去路長江湖寒縮蛟蜃藏楓柶正赤橙柑黃
煙銷日出聞漁榔洲渚宛轉山低昂蕭然瓶錫隨經囊
留宿肯戀林中桑兵餘莫嗟梵宇荒勝景未逐樓臺亡
寺門無人閉夕陽芋粟收作山中糧好說千偈恢禪綱
麾斥佛祖誰敢當我方無用廩太倉叨逐劔佩趨明光
醉歌欲覓玄真狂懷恩未得尋歸航明朝舉首空相望
雲飛笠澤天茫茫

送王孝廉至京省其父待制後歸金華

君來金陵自金華遠道縈確驅行車空山北風正多雪
歲晚何事穿泥沙君言省覲敢辭苦況是日下非天涯
問安已畢起稱壽白門酒香還可賒明燈客窓共夜語
便覺春意迴寒槎予亦叨恩在京國早踏街鼓聞初撾
日斜歸來就空廨索寞不異投林鴉家人千里望未至
虛聽檐鵲鳴喳喳羨君父子此相見頓起歡笑忘咨嗟
異鄉逢人即可樂況爾骨肉誰能加汝翁文章擅當世

片語落紙爭傳誇身登昌朝列侍從日曳珮玉趨南衙
捧匱當殿曉進史秉燭鎖院宵書麻觀君才氣已畧似
青海異種多騶駟絲綸便可令世掌胡為趣別東還家
阿婆在堂待調膳計日敢使歸期差往來兩地慰親念
如君孝意誠堪嘉勞勞亭下冬日短江冰未解魚難叉
送君揖手忽已遠烏巾獵獵風中斜重關歸拜想無恙
故園正見開梅花

穆陵行

永穆陵宋理宗陵也在會稽元至元初西僧揚
發輦真住請發宋諸陵許之既取其殉寶復以
理宗頂骨為飲器後籍入官以賜帝師天兵克
元詔求得之命有司歸葬焉

樓船載骨沉海水金槌晝入三泉裏空中玉馬不聞嘶
日落寢園秋色起魚燈夜滅隧戶開弓劍已出空幽臺
髡胡暗識寶氣盡六陵松柏悲風來玉顱深注酖酥酒
誤比戎王月支首百年帝魄泣穹廬醉骨飲冤愁不朽

幸逢中國真龍飛一函雨露江南歸環珮重遊故山月

冬青樹死遺民非

世傳有士嘗竊諸帝骨埋屏處樹冬青為識

千秋誰解銅

南山世運興亡覆掌間起輦谷前馬蹄散白草無人澆

麥飯

獨遊山中憶周記室砥

借居水北鄰雲巖醒遊醉卧月滿山空山孤愁似放逐
踐蛇衝虎窮幽探綠梯上窺萬仞壁垂綆下汲千丈潭
幽蘿翳壑變朝晦怪卉發澗留春酣青山識我豈生客

曾與周子來聯驂是時秋高鶴聲厲霜降兩崦纔收柑
飯餘洗足上堂坐手揮談麈風飈飈如今故人亦遠去
帆葉暮落吳江南斷崖蒼蘚漫舊刻往夢追想情何堪
巴僧不厭客屢至篝燈夜禪同一龕風迴忽灑石門雨
日出盡消溪市嵐乃知山水有深趣天意獨許窮人諳
我今豈是慕高隱非才濫進能無慙業緣種種去畧盡
惟有佳句猶相耽便求安心向佛祖不待婚嫁女與男

贈墨翁沈蒙泉

南朝墨法稱奚家相國謬費盈連車堆金欲沽世已少
至今好事成咨嗟潘生後出亦竒絕峨眉仙子嘗相誇
紫殿曾供寫飛白玉堂每用書官麻人間留藏敢輕試
傳玩正比雲龍茶沈翁遠得二子妙珙璧自美誰能瑕
徂徠老節燒欲盡萬杵夜搗玄霜華錦囊贈我忽在几
光怪迸屋驚早鴉一餅團團未磨缺似月食盡逢妖蠶
此物宜歸大手筆濡染竹帛垂無涯上當紀頌聖功德
下可論載臣忠邪我今才薄沉病退破硯久棄塵生窪

一朝得此復何用，慚注魚豕箋。蟲鰕摩挲忽動揮，灑興
聊吟險句追。島又高堂淋漓為君掃，醉汙舊賜宮袍花。
淮南張架閣家舊有樓，在儀鑿江上。經兵燹已

廢與予會吳中乞追賦之

秋風嘗歌遠遊篇，樓中舉手招飛仙。山奔海瀉盡供覽，
逸思每出孤鴻前。雕欄一別應非昨，幾度淮南桂花落。
酒酣却作望鄉人，那得東歸似黃鶴。風景如今總厭看，
客愁何處更凭欄。欲問日邊知遠近，浮雲回首蔽長安。

題朱元暉雲山圖

海岳老仙非畫工自有丘壑藏胸中大兒揮灑亦莫比
妙趣政足傳家風數文閣下書幃淨夢入空山覺衣冷
起拈綵筆寫幽蹤一片飛來楚雲影彷彿三相與九嶷
翠峯猶抹二娥眉水生江上鴻歸後樹暗沙頭春去時
蒼蒼遠渡連平麓煙火參差幾家屋林深谷靜斷行人
唯有禽聲啄枯木偶向高齋玩此圖斷縑猶費千金沽
自緣絕壁人間少如此雲山何處無

題朱氏梅雪軒

石城山居梅萬塢冒雪曾來扣僧戶爛然如見會羣妃
白鳳繽紛下瑤圃數片輕吹著鬢華乍看是雪又疑花
迷魂亂眼春如海那辨南枝映竹斜獨披鶴氅穿林去
凍壓寒梢應幾樹聽響方知夜灑時聞香始識繁開處
回首春風憶舊遊夢尋歸路隔羅浮年來驢背無詩思
醉踏塵埃空自愁聞道君家谿上下玉蘂瓊英巧相亞
履跡誰來東郭朝笛聲不起南樓夜翠羽驚啼莫怨猜

破寒宜共一樽開
雪晴花發須相記
我亦扁舟乘興來

和衍上人觀梅

籃輿偶出青山郭
寒雨初晴凍雲薄
梅花一路幾千株
半發園林半邨落
夜窓轉曙雞欲驚
寒谷回春蝶應覺
浩蕩才迷醉客魂
嬋娟更伴幽人樂
我來如蝶東西飛
不敢題詩慙筆閣
歸來落月照書屋
重覓餘馨夢難托
高僧已澄法眼觀
也愛一枝供寂寞
便拖藜杖敲竹扉
遮莫人嗔賓客惡
風雨休嗟已亂飄
世間何物長如昨

題李德新中宗射鹿圖

赭袍玉帶虬髯怒人如真龍馬如虎英風猶似天可汗
肯信昏孱困韋武上林草綠聞啾啾飛鞚霹靂捎長楸
畫旗圍合晚猶獵後庭雙陸誰行籌追遊不記房陵辱
五王謫來勢猶獨空誇大羽發無虛不射妖狐射生鹿
畫圖令人生感嗟天寶回首飄胡沙神孫早解習祖藝
不遣銜出宮中花

題趙希遠宋杭京萬松金闕圖

長松掀髯若羣龍下繞宮闕雲千重
鳳凰山頭望前殿
翠濤正涌金芙蓉海門日出潮初上
白鶴飛來近仙掌
百官候綴紫宸班
露滴朝衣氣森爽
漢宮揚柳唐宮花
容易零落空繁華
何如可獻至尊壽
茯苓美似安期瓜
鑿輿因戀湖山好
樓閣清陰勝蓬島
不知風雨汴陵前
騎卒新樵幾株倒
當日榻前初進圖
黃金趣賜聞傳呼
何年流落在人世
父老猶看思舊都
客行近過吳山下
落葉空林惟敗瓦
豈無畫史似前人
秋色淒涼不堪寫

芥舟詩

估客海上誇乘風大艚遠戛龍魚宮帆如乘雲落天外
不假羽翼行虛空驚濤拍山撼難動安卧每到扶桑紅
回頭却笑垂釣子斷溝老葑留孤蓬烏知達人解物表
坐視大塊舟航同風輪晝夜不停轉元氣下載浮鴻濛
泰山亦與一塵等何以巨細論雌雄君今齋居那苦小
自比置芥坳堂中將身便欲入無間險語乍出驚愚蒙
我聞懸珠納萬象此事尚覺勞神功萬千毫髮盡非有

幻相欲別誰能窮
君行莫鼓萬里舵
天游閉戶隨西東
何須更待積水厚
區區往問南華翁

題周遜學天香深處卷

仙芬染骨濃無跡
秋入畫堂簾不隔
夢尋老蟾煙霧迷
碎落金蟲夜愁寂
素娥倩我無兩叢
萬古散吹秋滿空
熏爐不藝象籠火
人倚畫欄清影中
蕙蘭暗泣幽馨歇
只有瑤芳占涼月

象

海山巨獸堪乘戰，番使前年遠來獻寶纓。纏絡錦襜垂
拜舞，如人向金殿。仙仗時巡出鳳城，車輿頻駕不曾驚。
有牙莫畏焚軀禍，天子深仁愛爾生。

題茅叟夏山過雨圖

前山冥冥雲欲開，後山隱隱猶聞雷。江南六月風雨過，
樹暗不見巫陽臺。奔湍衝斷石橋路，下瀉谷口相喧唼。
陰開林壑鬼神去，氣溼古洞蛟龍回。人家出門看新霽，
泥封陸果多揚梅。漁樵欲歸謂已暝，返照石壁蟬鳴哀。

山中此景誰解寫茅翁素有丹青才新圖一片似海岳
高堂未展涼先來嗟余久逐揮汗客蓆帽障日趨黃埃
問翁幾欲東遊去如此畫圖安在哉

偃松行

松在天平山獅子巖下

龍門西岡魏公祠祠前有松多古枝長身蜿蜒橫數畝
巨石作枕相撐撐春泥半封朽死骨凍鮮盡裂皴生皮
無心昂聳上霄漢偃仰獨向荒山陔蟄雷破嶽撼不動
千載一夢醒何遲政如卧龍未起日深意有待風雲期

太湖月出照夜魄天峯雪積埋寒姿濤聲時吼若鼯息
野老驚起山僧疑左伸右屈多異態天自出巧非人為
畫師安能把筆寫樵子豈敢操斤窺杜陵枯枿已憔悴
蜀相老柏非瑰竒何如此樹怪且壽呵衛定想煩靈祇
不知已閱幾人代游客過盡今存誰明堂屢興不見取
得全正愛同支離我嘗來觀忍遽返醉坐其上高吟詩
葛陂筇竹亦騰化神物終去可久羈何當一叱使飛起
載我萬里遊天池他年還訪舊城郭正是白鶴歸來時

白馬澗

白馬何不居天閑乃在古寺長松間
竒姿不受世羈絡遠自竺國馱經還
澗邊飲罷寒雲起恍惚化龍跳入水
空山夜雨不聞嘶埋沒蹄痕紫苔裏
高僧一去今幾年世上神駿還誰憐
莫令老逐風塵子憔悴哀鳴途路邊

贈治冠梁生乞作高子羔舊樣

野人散髮秋半稀小冠宜著稱短衣
清時無能恥恩澤朝簪乍脫歸田扉
進賢莪莪在頭上此物須當付卿相

閉門方欲誦詩書煩君為製依我樣

賦得烏衣巷送趙丞子將

差差舞羽多光彩鄉國初辭度雲海江南門巷有題名
識得當年故巢在春風三月滿京華肯入尋常百姓家
隨鶯已度龍池柳引蝶還穿鳳苑花綠蕪芳草長干渚
樓閣初晴社前雨江邊今日有離筵留人看上橋頭語

宿蔡邕夜起

四更雞叫七星爛獨起開門候天旦月掛愁邊人影低

風驚夢裏烏羣散孤舟嫠婦寒自泣破屋老農貧屢歎
早餐欲發未遑安客路飄零正多難

天閑青驄赤驃二馬歌

漢家諸將開經濟列宿儲精降人世天遣同成一代功
亦有房星化騏驎青驄剪髮高作花赤驃灑汗微成霞
人間何處得竒種恍惚西至踰流沙年來百戰從天子
曾逐烏騅到江死不慙飽食玉山禾天廡時清少鞭使
周王八駿去不來唐帝六馬應凡材何如二龍總超絕

蹴踏四海荆榛開圍官雙鞵頻迴顧萬里長揪恐驚鷲
嘶處秋生閭闔風浴時曉動昆明霧一匹前牽一匹騎
馳道每出隨龍旗態閒步穩識上意不敢搖頓黃金羈
昨看巡狩還都邑鏡吹聲催移仗急羽林萬騎從如雲
追逐飛塵豈能及嗟哉此馬不異人乘時際遇蓋有神
請看垂耳鹽車者那得昂藏八尺身

同謝國史遊鍾山逢鐵冠先生

日日城中望鍾山孤塔縹緲峯孱顏山靈嘲我不一到

但命俗駕趨塵闕聖恩今朝許休沐得與謝客同躋攀
出郭未至景已好松風一派連清灣空林無人遇釋子
知有曲徑通禪闕舉頭見寺去尚遠鐘磬響落浮雲間
登高不知已幾里但怪力盡愁辛艱衆山雜沓總在下
如擁劔珮趨朝班時當嚴冬雪始霽古木寒瘦泉流慳
梁僧遺墓卧殘碣宋帝廢塚埋深菅六朝陳蹟不可問
但見石老莓苔頑豪華歇盡形勝在劫火幾度燒空殷
鐵冠先生有道者往往人見騎黃斑相迎為指幽絕處

淪茗留坐聽潺湲莫嫌癡客暮未返日墮江水鴉飛還
欲營一遊豈易得長來不比山僧閒

喜家人至京

家人遠來如我歸骨肉已是鄉園非妻羸女病想行苦
塵土覆面風吹衣裝車日暮解牛輒呼燭買酒敲鄰扉
客懷乍見不得語一室相對情依依憶昨初蒙使者徵
遠別田舍來京畿小臣微賤等蟻蝨名對上殿瞻天威
詔從太史校金匱每旦珥筆趨彤闈春遊禁苑侍鶴駕

冬祀泰時隨龍旂有時青坊坐陪講宮壺滿賜霑恩輝
草茅被寵已踰分不才寧免誚與譏海鳥那知享鐘鼓
野馬終懼遭籠韉江湖浩蕩故山遠歸夢每逐鴻南飛
常時出院就空館僮僕愁對語者稀知君在舍亦岑寂
歲暮雨雪吟蚬蟻今宵得見信可樂如獲美饌飽我飢
但憂兄弟尚遠隔言笑未了仍歛歎何當乞還棄手版
重理吳榜尋漁磯門前親種一頃稻婢供井臼妻鳴機
秋來租稅送縣畢却酒可醉雞豚肥誰言此願未易遂

聖澤甚沛寧終違

北山觀猿

黑衣公子何婀娜飛挂枯梢不愁墮幾迴呼下白雲間
拋賜曾嘗內園果家鄉何處是巴西回首煙蘿望欲迷
料得孤舟江上客月明少聽一聲啼

客舍雨中聽江卿吹簫

客中久不聞絲竹此夕逢君吹紫玉斷猿哀鴈總驚啼
我亦無端淚相續數聲嫋嫋復嗚嗚散入寒雲細欲無

愁望洞庭空落木夢遊秦苑總荒蕪曲中只訴君心苦
不道人聽更淒楚關山燈下歎羈臣江浦舟中泣嫠婦
憶昨閨門費酒貲玉人邀坐弄參差彩霞深院花開處
明月高樓鶴去時如今忽在他鄉外風雨寒窓兩憔悴
恨無百斛金陵春同上鳳凰臺上醉始知嶮谷枯篁枝
中有人間無限悲願君袖歸挂高壁莫更相逢容易吹

謝友人惠兒羅被歌

蠶工細擘冰蠶繭織得長衾謝縫剪蒙茸柳絮不愁吹

鋪壓高牀夜香軟朔風入闕凋白榆塞寒此物時當須
明燈熾炭夕宴罷薦寢宜共紅氍毹海客揚帆遊萬里
得自崑崙國中市歸來遺我見遠情重似鴛鴦合歡綺
詩人鶴骨欺霜稜曾直禁署眠青綾自從身退合閒卧
只愛擁紙同山僧今朝得此何竒絕展覆不憂兒踏裂
便思清夢伴梅花靜掩寒窓聽風雪越羅蜀錦安可常
洞房美女謾熏香誰知一幅春雲暖即是溫柔堪老鄉
會宿成均汲玉兔泉煮茗諸君聯句不就因戲

呈宋學士

白兔如嫌桂宮冷走入杏花壇下井嫦娥無伴每相尋
水底亭亭落孤影曾搗秋風玉白霜至今泉味帶天香
玉堂仙翁欲飲客轆轤夜半響空廊齋燈明滅茶煙裏
醉魂忽醒松風起只愁詩就失彌明殘雪滿庭寒似水

大全集卷九